

Inzko u Bundestagu: Međunarodna zajednica i dalje igra ulogu od vitalnog značaja



“Očigledno je da je posao u Bosni i Hercegovini daleko od završenog”, rekao je danas visoki predstavnik Valentin Inzko u Berlinu.

U obraćanju Komisiji za evropska pitanja njemačkog Bundestaga, visoki predstavnik je rekao da neuspjeh u formiranju državne vlade, te činjenica da država nije u mogućnosti da usvoji budžet za 2011. godinu, otkrivaju “strukturalne slabosti daytonskog koncepta”. Ova situacija otežava funkcioniranje zemlje, umjesto da se omogući njen razvoj.

Visoki predstavnik je naglasio da su posljedice trenutne političke situacije vrlo loše. „U posljednjih godinu dana došlo je do značajnog smanjenja direktnih stranih investicija, pola miliona ljudi je nezaposleno, a penzioni sistemi s velikim naporima isplaćuju penzije”, rekao je Inzko.

„Dayton i koraci koji su načinjeni kako bi se sporazum proveo ne mogu se vratiti unazad jednostranim potezima“, rekao je Inzko i dodao da su „država BiH i njene institucije još uvijek ranjive bez zaštite visokog predstavnika“.

Visoki predstavnik je također naglasio da su „pristupanje

Evropskoj uniji i NATO-u procesi koji imaju potencijal da potaknu pozitivne promjene“.

Na kraju svog obraćanja Komisiji za evropska pitanja Bundestaga, visoki predstavnik je zaključio kako je cilj jaka i funkcionalna država, kao i jaki i funkcionalni entiteti koji zajedno rade u interesu građana.

Tokom svoje posjete Berlinu, visoki predstavnik se također susreo sa visokim dužnosnicima ureda kancelarke Angele Merkel i Ministarstva vanjskih poslova Njemačke.